

# Instituziuns enconuschentas e main enconuschentas

Il chantun Grischun ha nominà sia represchentanza en cumissiuns ed instituziuns

■ **(anr/ac) Da las medias ed il medis ufficials enfin ils stimaders da donns da selvaschina, da la represchentanza en las Ovras electricas Alva SA enfin la fundaziun dal Museum retic. Il chantun ha nominà la represchentanza dal chantun e collavuraturas e collavuratur en uffizi assessoric a partir da l'emprim da fanadur. Ina sfegliada tras la represchentanza chantunala.**

I dat diversas cumissiuns chantunales cun ina preschientscha regulara en la publicitad grischuna ed uschia era pli enconuschentas. Per exempel la cumissiun chantunala da cultura, ni forsa la cumissiun da chatscha ubain la cumissiun per la promoziun sportiva e la cumissiun per la furmaziun professiunala. Main enconuscenta per exempel è l'existenza dad ina cumissiun chantunala da surveglianza per experiments cun animals, pli probabel preschenta sulet ad ina minoritad è la cumissiun da nomenclatura u quella incaricada da coordinar problems da scola dal Moesano e dal chantun Tessin. Il chantun Grischun porscha via sia preschientscha e la rait ina curta descripiun da l'incumbensa da la cumissiun er ils numns da commembras e commembers. Uschia sa fatschenta la cumissiun da nomenclatura presidiada dad *Oswald Armin* da Cuir a cun dumondas da las vischnancas per midar, stizzar u introducir novs numns geografics da la mesiraziun uffiziala. In pau dapli lavur ha la cumissiun eraldica retschavì ils davos onns en consequenza da las fusiuns communalas. Part da quel gremi fa il manader da l'interpresa da grafica e reclama communicaziun.ch, *Armin Spescha*. Avant quatter onns è el vegni dumandà dal chantun da far part da la cumissiun sin fundament da la vopna creada da sia fatschenta per la vischnanca Lumnezia. Spescha ha explitgà da represchentar en la

cumissiun la part grafica sper il represchentan dal chantun e l'eraldicher classic. Ina lavur ordvart interessanta, tant pli ch'i saja da resguardar reglas da l'eraldica fitg veglias. Ina situaziun dal tuttafatg cuntraria a la grafica moderna fitg individuala, ha Spescha accentuà. Uschia ch'el è sta pront da star a disposiziun a la cumissiun per ulteriurs quatter onns.

## Augmentà la cumpart da las dunnas

La commembranza da las diversas cumissiuns e la represchentanza chantunala en las instituziuns ha chaschunà intgina dis-

cussiu en il cussegl grond a chaschun da la sessiun dal favrer passà. En connex cun la represchentanza feminina en las istanzas che pliras deputadas han crititgà per manglusa. Il motiv probabel che la cussegliera guvernativa *Barbara Janom Steiner* ha explitgà en la communicaziun dal glindesdi passà che la novissima nominaziun haja augmentà la quota da dunnas per 2,6 procent sin 26,3 procent. Janom Steiner ha explitgà che la regenza sa sprovia da chattar dunnas per las diversas cumissiuns ed i saja gartegià da resguardar eegal la schlattaina tar la nominaziun ac-

tuala da novs commembers. I saja dentant er impurtant che las organisaziuns enviadas da proponer candidatas e candidats per las cumissiuns resguardian las dunnas. Quai na saja deplorablamein betg adina il cas, ha la cussegliera guvernativa fatg attent. I dettia era secturs nua che las dunnas prontas per surpigliar ina incarica na sajan betg avant maun. Ch'ina quota fixa da dunnas megliereschia la situaziun na crai la cussegliera guvernativa betg. Ina limitaziun dal temp d'uffizi en las cumissiuns chantunales n'exista betg, ha Janom Steiner menziunà. Or da sia op-

tica è ina tscherta regiuvinaziun impurtanta per che nova gliued portia novas ideas en ils gremis da cussegliaziun e represchentanza chantunala.

## Represchentanza chantunala

Represchentanτας e represchentanτας elegia il chantun medemamain en diversas interpresas è fundaziuns u instituts da scolaziun cun participaziun chantunala. Tar la gronda part sa tractia dad ovras electricas sco per exempel la Repower nua che l'antierur cusseglier guvernativ *Claudio Lardi* ed il cusseglier dals chantuns *Martin Schmid* represchentan ils interess grischuns. Lardi è ulteriuramain da chattar al timun dal cussegl da scola dal Center da scolaziun per sanadad e fatgs socials. L'antierur cusseglier guvernativ *Hansjörg Trachsel* represchenta il chantun en il cussegl d'administraziun da las Ovras electricas Engiadina ed el presidiescha medemamain il cussegl d'administraziun da las Ovras socialas dal chantun Grischun. Il cusseglier dals chantuns *Stefan Engler* presidiescha il cussegl d'administraziun da la Viafier retica ed exequeschia quella incumbensa medemamain per la Grischelectra SA. La cussegliera guvernativa *Barbara Janom Steiner* represchenta il chantun sco patrun en la cassa da pensiun chantunala enfin la fin da l'onn ed ella presidiescha medemamain la Fundaziun tetgala caritativa grischuna. L'antierur cusseglier naziunal *Hansjörg Hassler* chattan ins al timun da la Societad agricola da credit e l'antierura cusseglier naziunala *Brigitta Gadiant* timuna il cussegl da scola da la Scola auta per tecnica ed economia. En general è la represchentananza grischuna en divers gremis entras la politica grischuna sa reducida entaifer ils onns passads.



Il chantun Grischun ha da reparter diversas incaricas en cumissiuns e represchentananza en gremis cun participaziun chantunala. FOTO SOMEDIA